

豫章叢書

第一四八冊

類

彙

纂

書

第一四八册

雪坡舍人集卷四十六

新昌 姚勉 著

從子龍起 編

疏語

太平興國寺再建淨土院接待榜

昔日龍舒居士王公日休勸人念阿彌陀佛早修
西方淨土謂一人念佛則彼處生一蓮花標其姓
名身後卽生其上此最是誘人爲善之說然世人
多不之信蓋有其故試相與言之極樂國不知有
否果有之必在西方嘗以漢書考之張騫奉使西

域有所謂身毒國注云卽今天竺國佛經載釋迦
如來嘗在天竺國及舍衛國說法則佛之所在是
卽佛國矣漢張騫曾到唐時三藏玄奘師往西國
取經亦曾到雖曰佛國佛則久遷化矣但其佛法
存耳天竺國及舍衛國雖與中國異亦是山川土
地耳漢張騫唐玄照初不見有所謂蓮花及人姓
名標其上亦不曾見中國有何人死後在彼處且
張騫及玄照之遊也經歷多少險難方到其處今
中國之人在生曾遠遊者不過千百里又遠則萬
里亦有一生不曾遠遊者亦有一生身居鄉落足

不到州城府治者在生且如此則百年以後當生
極樂國不知自何門而出何路而往何人爲之指
引何人與之糧食又何以能越險難借曰善念護
持菩薩接引假如有十萬百萬人念佛皆當生淨
土不知還有十萬菩薩百萬菩薩接引否盡中國
人念佛生淨土西域小國能容之否又不可云佛
國家之外別有淨土也何況蓮花爲物中國亦有
之花葉根莖甚脆而薄人何以生其上縱生其上
無屋宇何以庇風雨無几席何以供坐卧此皆誕
謾恍惚之說立爲此說雖欲化人人亦不信縱可

化愚人亦不可化達者然則無淨土乎曰有諸佛
教人只要清淨心地耳心地清淨卽是西方淨土
樂道無憂卽是極樂世界七情不染卽是七寶楊
枝八難不侵卽是八功德水貪愛之中頓回淡泊
嗔怒之際忽使清涼卽是猛火生蓮花愁憂煩惱
攝之以順乖爭凌犯處之以和卽是地獄化爲天
堂與人慈悲方便念念誠恪實地修行卽是黃金
爲城琉璃爲路故曰苦海無邊回頭是岸又何必
外求極樂國也哉世之人不問聖賢不問智愚不
問老幼皆同此純粹至善之性同此一性故皆同

此理理之所在無今無古永不壞爛故曰常住以理曉人人心同之人誰不信故今日普化十方重建太平興國寺中一淨土院以闢接待不敢再以人所不信之說相勸告只以人所同信之理相勸告也淨土院舊有之南渡建炎兵火遂成廢壞淨土之院雖廢壞而淨土之名與淨土之地則未嘗廢壞也今欲復興建之不欲只作尋常應奉香火院念天下皆有接待獨吾鄉無之近年雖有欲建立者然未有成就無他斬新建立平地上起風濤不如興舊起廢之爲順也接待一寺所以苦欲建

立者亦無他意但念人之常情飢則思飧倦則思
息垢膩則思浣濯假如自己出在外方跋草涉水
梳風櫛雨正此勞苦糧食且盡忽得下處號爲接
待不必糴而自有爲之置食者不必賃而自有爲
之設榻者不必歸家而自有爲之浣濯者到此地
心豈不樂推已及人則人之在外者亦如此矣故
今欲復興建太平興國寺淨土院以爲此舉一可
以修復破壞之處一可以普利雲水之計吾鄉佛
國人有善心將共發歡喜心而成之矣今所欲成
者乃欲建一水陸堂以爲並包兼容之地建一藏

殿以爲運轉無窮之本緣雖大而易就事至簡而易行眾力爲之不日成就今諸處建法堂建藏殿者甚眾尙皆蒙眾力喜捨況此欲濟人利物者哉人孰無是心哉或謂作善事可以求福此却不必論作善降之百祥積善之家必有餘慶善與福慶是一類事作善自是有福但不必求福耳不求爲功而功立則功大不求獲福而福至則福大淨土旣成善心堅固家家菩薩人人諸佛和氣薰蒸風雨調順國泰民安公私清吉則淨土極樂國世界只在眼前不必求之西方矣須至榜示者

右伏以西方淨土不離當處一絲毫南寺伽藍包盡
河沙千世界拈起舊時公案鼎新今日家風要撇開
廣大道場不是作尋常律院蓮天龍寶藏轉法輪卽
轉食輪開水陸法堂無人相亦無我相普接十方雲
水眾不問四海江湖人來不拒去不追困則眠飢則
食綠楊枝時時甘露青蓮花步步人天發三菩提心
脚根下雙修福慧飲八功德水眼孔中便放光明眾
力維持一時成就萬年不朽大地無邊壯觀重新恢
復南渡建炎之氣象皇圖仰贊輝煌太平興國之規
模昭揭通衢明知此意

建淨土院疏

吾州南招提舊有淨土院太平興國中諸刹一時
建兵戈偶煨燼劫變法不變公案拈復新火裏優
鉢現今當如是觀廣大作方便中開水陸堂日日
法輪轉雲水任去來救度十方徧佛日耀萬古清
風生八面須憑歡喜捨成此廣大願人生天地間
石火與迅電及茲強健日宜作最上善各生慈悲
心勿作人我見歡然施財力成就速如箭福報當
不虛愈施愈充羨說偈恐未周更作儷語勸

右伏以一片閑田幾度賣來還自買千年公案這回

拈出又重新壯觀復興家風大振堂開水陸普資百
年萬億眾生藏湧龍宮一轉五千四十八卷成此無
邊功果是名最上福田眾大檀越維持一刹那間成
就四通八達不妨舊店新開一日三飡要使飢人飽
去請揮椽筆速注寶銜

太平寺內宮建法堂疏

內宮立院招提中最號清幽外護有人刹那間復新
創建締雨花之梵宇紆卷葉之回廊金雞唧粟於香
積之厨玉猿獻果於法王之座密隱禪房花木靜依
老圃松篁衲被都蒙自可焚香宴座竹筇來訪也能

燒葉煎茶福有所歸是當必捨

天慶觀建梓潼殿疏

居梓潼七曲之山素昭靈響司桂祿九天之籍實主
榮通在他邦皆有於行宮宜此郡欲興於盛觀惟茲
新瑞素曰蜀江旣山川英秀之同乃僊聖棲遊之素
用哀眾力共建真祠就天慶觀寮取自天有慶之義
號文昌道院爲斯文大昌之符振作儒風主張吾道
庶咸知於嚮慕以益勵於踐修校德行校陰功有如
揭日出狀元出宰相式應連河

南道堂作雲堂疏

天道逍遙自有八景煙霞之趣人間遊戲可無十方
雲水之居開做琳堂欣迎羽駕鼓琴敲筑招鳳喚龜
煉頂燒丹驂鸞馭鶴朗吟過玉沼高卧看青山道人
瀟洒清幽施主康寧福壽翠梁玉棟何須桂館柏臺
玉鎖金龕便是蓬萊方丈

化三官殿疏

三元考校無非總攝於三官一念皈依自可興成於
一殿燈龕花几經卷香爐日修崇奉之儀天與康甯
之福圓成道果又何止百千萬年廣大善根不必齋

正七十月

建五雷醮疏

雷乃發聲將屆震驚之候人誰無過盍殫禱謝之誠
爰合羣資共修清醮里閭安泰民所欲天必從稼穡
登豐今以始歲其有請揮椽筆齊注寶銜

蓋飾澄江橋疏

跨虹脊於雙堤已誇偉觀甃龍鱗之萬瓦要着新功
了茲一段因緣做箇十分結裏惟暨茨惟丹雘如跂
翼如翬飛大手周全卽時了當揮金喜助眞成元凱
立橋衣錦榮歸自有相如題柱

內宮寺求僧疏

風雲借便卽成變化之鯤鵬雨露沾恩須作崢嶸之
龍象全憑傳世寶爲覓護身符倘蒙檀越垂慈卽以
比丘得度掀翻席帽圓殿前剗草之機分付金襴結
會上拈花之笑學佛便成佛知恩必報恩振太平千
載遺風做錦江一段勝事請揮大手特注芳銜

興善院求僧疏

捨妄趣真卽日脫皮換骨超凡入聖自今圓頂方袍大
檀越不吝千金小沙彌頓成三寶種果得果知恩報恩

余師姑題緣祠部疏 并序

本寺尼童妙清欲謀圓頂尙欠方兄須有富人爲

成妙果謹持短疏遍扣高闕一筆周全三衣具足
禮釋伽佛子爲師因比丘尼身得度欲成正覺願了
良因水到渠成花開子結定憑傳世寶爲覓護身符
若得都茶場官會八百千便有文思院勅綾三四尺
花生筆底草剡殿前發歡喜心現圓滿相盡在金多
長者重興鐵磨家風

帖請瑩和尚住成覺

松楸在望可勝瞻戀之懷香火結緣盍選精虔之主
乃眷靈峯山寺舊爲成覺道場昔妙光禪中之宗師
實先君方外之伴侶祐典座得瀉山地兩腳踢倒淨